



REPUBLIKA E SHQIPËRISË
KËSHILLI I MINISTRAVE

PROJEKTVENDIM

Nr. __, datë __/__/2026

PËR
KRITERET DHE PROCEDURAT E PËRFSHIRJES SË ORGANIZATAVE TË
SHOQËRISË CIVILE NË OFRIMIN E SHËRBIMEVE TË KUJDESIT
ALTERNATIV NË FAMILJE

Në mbështetje të nenit 100 të Kushtetutës dhe të nenit 26, pika 3, të ligjit nr. 92/2025 "Për kujdesin alternativ në familje në Republikën e Shqipërisë", të ndryshuar, me propozimin e ministrit përgjegjës për çështjet sociale, Këshilli i Ministrave.

VENDOSI:

Neni 1
Qëllimi

Ky vendim përcakton kriteret, procedurat dhe mënyrën e përfshirjes së organizatave të shoqërisë civile (në vijim OSHC) në mbështetjen e ofrimit të shërbimeve të kujdesit alternativ në familje, me qëllim garantimin e cilësisë së shërbimeve dhe mbrojtjes së interesit më të lartë të fëmijës.

Neni 2
Fushat e përfshirjes së OSHC-ve

OSHC-të mund të përfshihen në:

- mbështetjen e identifikimit të fëmijëve dhe familjeve në nevojë për kujdes alternativ, promovimin dhe ndërgjegjësimin për kujdesin alternativ në familje;
- mbështetjen e bashkisë në proceset e rekrutimit, përgatitjes dhe shërbimeve për fëmijët dhe familjet kujdestare së familjeve kujdestare;
- ofrimin e trajnimeve dhe mbështetjes së vazhdueshme për familjet kujdestare;

Neni 3
Kriteret për përfshirjen e organizatave të shoqërisë civile

1. Organizatat e shoqërisë civile ofrojnë mbështetje në ofrimin e shërbimeve të kujdesit alternativ në familje, sipas fushave të përcaktuara në pikën 2 të këtij vendimi, nëse plotësojnë të gjitha kriteret e mëposhtme:

a) Kriteret ligjore dhe administrative:

- i. të jenë të regjistruara sipas legjislacionit në fuqi;
- ii. të kenë në objektin e veprimtarisë ofrimin e shërbimeve sociale, mbrojtjen e fëmijës ose fusha të lidhura;
- iii. të mos jenë në procedura falimentimi, likuidimi ose në konflikt interesi me autoritetet vendimmarrëse;
- iv. të jenë të pajisura me licencë për ofrimin e shërbimeve shoqërore, kur kjo kërkohet nga legjislacioni në fuqi.

b) Kriteret profesionale dhe teknike:

- i. të kenë përvojë të dokumentuar jo më pak se 5 vjet në fushën e mbrojtjes së fëmijës, kujdesit alternativ, ose shërbimeve sociale;
- ii. të kenë një ekip multidisiplinar të përbërë, të paktën nga punonjës socialë dhe/ose psikologë të licencuar;
- iii. të zbatojnë metodologji të strukturuar të menaxhimit të rastit, në përputhje me aktet nënligjore përkatëse;
- iv. të kenë kapacitete për ofrimin e shërbimeve në mënyrë të vazhdueshme dhe në përputhje me standardet e cilësisë.

c) Kriteret organizative dhe të menaxhimit:

- i. të kenë strukturë të qartë organizative dhe përshkrime të roleve dhe përgjegjësi;
- ii. të disponojnë politika dhe procedura të brendshme për mbrojtjen e fëmijës, etikën profesionale, dhe mbrojtjen e të dhënave personale dhe konfidencialitetin;
- iii. të kenë sisteme funksionale për dokumentimin, raportimin dhe ruajtjen e të dhënave;
- iv. të zbatojnë mekanizma të brendshëm monitorimi dhe vlerësimi të cilësisë së shërbimeve.

d) Kriteret financiare dhe të qëndrueshmërisë

- i. të kenë kapacitete të provuara për menaxhimin financiar të fondeve publike ose të donatorëve;
- ii. të kenë sisteme të brendshme të kontrollit financiar dhe transparencës;
- iii. të paraqesin evidencë të qëndrueshmërisë financiare për zbatimin e shërbimit gjatë periudhës së kontraktimit.

e) Kriteret e integritetit dhe sigurisë

- i. të zbatojnë procedura për verifikimin e integritetit të stafit (përfshirë kontrollin e figurës për punë me fëmijë);
- ii. të garantojnë mjedise dhe praktika të sigurta për fëmijët;
- iii. të respektojnë parimin e interesit më të lartë të fëmijës në çdo ndërhyrje.

2. Plotësimi i kriterëve të përcaktuara në pikën 1 vlerësohet nga një komision i ngritur nga bashkia, në bashkëpunim me strukturat përgjegjëse, në bazë të dokumentacionit të paraqitur dhe, kur është e nevojshme, nëpërmjet verifikimeve në terren.

3. Dokumentacioni për vlerësimin e organizatave të shoqërisë civile si dhe vlerësimi përkatës është i përshkruar në shtojcën nr. 1 bashkëlidhur këtij vendimi.

Neni 4 Procedurat e përfshirjes

1. Organizatat e shoqërisë civile përfshihen në mbështetjen e sistemit të kujdesit alternativ në familje nëpërmjet:
 - a) marrëveshjeve të bashkëpunimit me njësitë e vetëqeverisjes vendore për aktivitete mbështetëse, këshilluese, ndërgjegjësuere, trajnuese dhe për forcimin e kapaciteteve në fushën e kujdesit alternativ në familje;
 - b) mbështetjes teknike dhe profesionale për bashkitë në proceset e identifikimit të nevojave, rekrutimit, përgatitjes dhe mbështetjes së familjeve kujdestare, në përputhje me legjislacionin në fuqi;
 - c) ofrimit të trajnimeve, këshillimit profesional dhe mbështetjes psikosociale për familjet kujdestare dhe fëmijët në kujdes alternativ, në bashkëpunim me strukturat përgjegjëse;
 - d) pjesëmarrjes në mekanizmat ndërinstitucionalë në nivel vendor, në funksion të koordinimit, referimit dhe monitorimit të rasteve, sipas legjislacionit në fuqi;
 - e) mbështetjes së bashkive në monitorimin dhe vlerësimin e zbatimit të planeve të kujdesit alternativ në familje.
2. Njësia e vetëqeverisjes vendore është përgjegjëse për organizimin dhe administrimin e procesit të përfshirjes së organizatave të shoqërisë civile, në përputhje me legjislacionin në fuqi dhe në veçanti:
 - a) identifikon dhe vlerëson nevojat për mbështetje në fushën e kujdesit alternativ në familje, në bazë të analizës së situatës dhe të dhënave të disponueshme;
 - b) shpall thirrje për shprehje interesi ose forma të tjera transparente bashkëpunimi, në përputhje me legjislacionin në fuqi;
 - c) administron dhe shqyrton dokumentacionin e paraqitur nga organizatat e interesuara, duke verifikuar përmbushjen e kritereve të përcaktuara në këtë vendim;
 - ç) kryen vlerësimin e kapaciteteve teknike, profesionale dhe organizative të organizatave, kur është e nevojshme edhe nëpërmjet verifikimeve në terren;
 - d) lidh marrëveshje bashkëpunimi me organizatat e përzgjedhura, duke përcaktuar qartë rolet, përgjegjësitë, standardet e bashkëpunimit, mekanizmat e raportimit dhe monitorimit;
 - e) mbikëqyr zbatimin e marrëveshjeve të bashkëpunimit dhe cilësinë e mbështetjes së ofruar.
3. Përfshirja e organizatave të shoqërisë civile, nuk cenon përgjegjësinë e njësisë së vetëqeverisjes vendore për garantimin, koordinimin, vendimmarrjen dhe mbikëqyrjen e shërbimeve të kujdesit alternativ në familje, sipas legjislacionit në fuqi.
4. Procesi i përfshirjes bazohet në parimet e transparencës, bashkëpunimit, mosdiskriminimit, interesit më të lartë të fëmijës dhe trajtimit të barabartë të subjekteve pjesëmarrëse.

Neni 5
Roli i strukturave përgjegjëse

1. Ministria përgjegjëse për çështjet sociale:
 - a) siguron koordinimin në nivel kombëtar dhe harmonizimin e praktikave;
 - b) monitoron zbatimin e këtij vendimi.
2. Shërbimi Social Shtetëror:
 - a) ofron mbështetje teknike për njësitë e vetëqeverisjes vendore;
 - b) monitoron cilësinë e mbështetjes dhe aktiviteteve të realizuara nga organizatat;
 - c) raporton periodikisht pranë ministrisë përgjegjëse.
3. Njësitë e vetëqeverisjes vendore:
 - a) organizojnë dhe administrojnë procesin e përfshirjes së organizatave;
 - b) sigurojnë administrimin dhe mbikëqyrjen e marrëveshjeve të bashkëpunimit me organizatat
 - c) garantojnë koordinimin me strukturat e mbrojtjes së fëmijës dhe aktorët lokalë;
 - ç) raportojnë periodikisht mbi zbatimin e këtij vendimi.
 - d) mbajnë dhe administrojnë regjistrin e organizatave të përfshira;

Neni 6
Hyrja në fuqi

Ky vendim hyn në fuqi pas botimit në Fletoren Zyrtare.

K R Y E M I N I S T R I

EDI RAMA